

## **Kayëta iyanar Piyer in Lilaya in**

Akayëta aŋo ro Piyer yëgwën babi okërecen od şapër bax gër Owun or Rom ok. Arixëra banëbi rixërand do bani sorond mbaŋ gayik aŋa ŵa këni end Yesu Kërisët eŋ. Piyer ga wël baxo end toro indebën eŋ, xwitanaxën babi mëne Kaxanu mbaŋ ye ko do aŋap yapëk eni bayi ga xwëta këno. Afel fel babi bëte Kaxanu sana këbi eni gi bulunda ir bër fexën këbi Kërisët. Are re baxo bëte eni kemëna eni gi bela bër këŋo riyeinënd Kërisët, gayikako Angoc and Kaxanu aŋ gër ola orebën hi ko. Er ex gër akayëta in:

Ecëmar el: 1.1, 2.

End eyar ed apexa el, do gë owënëk eŋ: 1.3-2.3.

End bulunda ir Kaxanu, end olëngw do gë ebuŋan ed gër toro eŋ: 2.4-25.

End eñër do gë ebalër gër aminëmëra eŋ: 3.1-22.

End toro ir ang Yesu Kërisët eŋ do gë end oyekax eŋ: 4.1-19.

Epëb ed bëlëngw bër gër amara el do gë eperëna el: 5.1-11.

Epelar el do gë ekaran ed benjekax el: 5.12-14.

### *Ecëmar el*

<sup>1</sup> Wëno Piyer, parëxanda ir Yesu Kërisët in këŋun yëgwënëlınd wën bër sana këŋun do

ŝapër kën gër owar or Poŋ, gë Galasi, gë Kapa-dos, gë Asi do gë Bitini bën.

<sup>2</sup> Faba Kaxanu kē nangënd beÿ bën dek đamana ex gixën. Gë enang elo yata kēŋun gë epit ed fit kēŋun gë Angoc andexëm el, en tēfaxënënd endexëm eŋ do eŋun wunētaxën gë oŝat or Yesu Kërisët oŋ. Awa cēnarēlex de oyekax ol do gë obetak ol gër ola orewën!

### *End eyar ed apexa eŋ*

<sup>3</sup> Cēkwanēŋone Kaxanu, Sēm ir Axwën arebi, Yesu Kërisët. Gë axaÿēnan isēm irexëm in rēw kēbo gaŝēxe paŋ gë ekani ed Yesu Kërisët gër ecēs el ene cotaxēne eyar ed gë aniyan el.

<sup>4</sup> Mondako ri ko ene cotaxēne er din ax cēsënd na in, er beya kēbo in, er din ax buyarënd na in, er din ax nēngwēta na in. Kaxanu ejo fenin kēŋun yaŋ gër orën.

<sup>5</sup> Wën kēŋun nēkonand gë panga ind Kaxanu in, gë ekwēta ed xwēta kēŋo el en cotaxën apexa and kē ŝanayaw gër bakey bapelatar aŋ.

<sup>6</sup> Ata wën mbaŋ kēŋun nēngandērand ado ga ŷapēk en caminara imēd nē end batēy bandanjēm band hi kēŋun gērēgako baŋ.

<sup>7</sup> Batēy baŋo kē wāsinënd oxēbën or ekwēta edewën ol. Mēŋ xēbēnēk nēmēc kaŋe ir wēnēnēk xodux do kē nemind fo. Ado ga hi baŋun batēy baŋo, mondako bax ex gi eŋata ed ekwēta edewën el gë ecēkw, gë enjaran, do gë epēb, and ko ŝanayaw Yesu Kërisët aŋ.

<sup>8</sup> Wën aŋan ŧan kēno, ado bayik elod ano wat ex na. Gērēgako dēŋ axwēta xwēta kēno ado

bayik ano watënd na, do ašot šot kën onënga or gë enjaran, or ala dëŋ ax kor na exo tēfēt.

<sup>9</sup> Ašot šot kën apexa and enjēw, and ex acosa and ekwëta edewën aŋ.

<sup>10</sup> Ata apexa aŋo bani šaland gë obal osëm eni nang bëlawënel bër bax reyarand end oyekax or fenin këŋun Kaxanu eŋ.

<sup>11</sup> Mokemëna bani xemënanđ eni nang nand feye do bënd fe fënëta ko Angoc and Kërisët and ebax gër ola orebën aŋ. Yama Angoc aŋo ga babi nangënenđ nde gana-gana fo toro ind Kërisët inđ do enjaran end ebax exo cot eŋ and ko fis aŋ.

<sup>12</sup> Kaxanu anangën nangën babi mëne wën xwënëk eyeyan ed lawënegu babi eni deyara el, ax gi bana ed fab babi bën bëlawënel. Bëfemëra bër Atëfëtan bën aŵëlaw fo wëlaw bani bebër kënun sëfëtanënd gërëgako gë panga ind Angoc Amënëk and xaniwëk gër orën inđ. Gër beŋo këbi xacërand eni yëkwa omeleka ak ga yandi këbi eni nangëdo.

### *End oŵënëk eŋ*

<sup>13</sup> Awa yëlarayindën aye, giyin gë anjus, kwëtin dek eyar edewën el gër oyekax or këŋun wëlanëgu Yesu Kërisët and ko šanayaw aŋ.

<sup>14</sup> Ang obaš or këŋo baxëtënënd fo, këreŋun balënd na end oñandi od šot ban gër onangërarëxe orewën eŋ.

<sup>15</sup> Barikan ang wën ko ar sana këŋun ak, wën bëte mënin mondako fo gër bënd kën rind yo.

<sup>16</sup> Gayikako aŷëgw yëgw këni: «Bëwënëk kën hi gayik wëno aŵënëk hi këme✧.»

✧ **1:16 1.16** Andolewit 19.2

17 Do angëmëne axëla këno xëland Kaxanu ang Sorix irewën fo, xarak mëñ këbi xitind bela bën gë epitëndër këm, ala kala gë bebër ri ko bën, diyayindën gë anjiy and Kaxanu nand hi kën gër yeba na.

18 Enimin, anang nang kën mëne Kaxanu aḡun dacët ex na gë bebër kë nemind: gë kodî ba gë kaḡe. Gër ola or gë ofëcak këm, or rëweli kënun bëxarëk bërewën racët këḡun.

19 Barikan gë oşat oxëbëanaxik or Kërisët or racët këḡun oḡ, oşat or şarëk ang or ifey iwënëk do ibëngwëk, and şadaxa këno fo oḡ.

20 Mëñ ex ar sana këḡo Kaxanu gana-gana fo, đamana exo dixën ngwën an. Do mëñ şanayaw ko gër bakey bapelatar baḡo në endewën na,

21 wën bër xwëta këno Kaxanu paḡ gë mëñ bën. Kaxanu xanin këḡo gër ecës do yël këḡo enjaran eḡ. Mondako bax, ex gixën ekwëta edewën el do gë eyar edewën el gër Kaxanu.

22 Gayikako awënënaya wënaya kën ga wã kën đal in, en cotaxën aminëmëra and gë eñḡënax end şonayak këm aḡ. Awa balëringdëleḡun mbaḡ andewën rewën aḡ, gë anjëlan ak đek do gë emëkw epeşax.

23 Enimin, bër rëw këbi Kaxanu gaşëxe hi kën, xarak ax gi ex na đe gë eneđa end kë şësënd, bari gë eneđa end ax cësënd na, gë eyeyan ed din ir din ed gë aniyand and Kaxanu el.

24 Gayikwa ala ar kë liyand yo,  
ang andës fo hi ko,  
đek enjaran endexëm eḡ, ang opëtëfët fo ex.  
Andës aḡ añañ kë ñayënd

do opëtëfët ok aŵini kē wīnind✧.

<sup>25</sup> Barikan eyeyan ed Axwën el, din ir din kē bayind.

Eyeyan elo ex Atëfëtan and nangën kënun aŋ.

## 2

### *End cale ingaşax eŋ*

<sup>1</sup> Awa tebin oxeȳ or ex yo, osit or ex yo, egi ed bëŷëŋenax bër kē labayand el, oyëkëraxi ol do gë odena od ex yo.

<sup>2</sup> Ñandiyindëleŋun ang omër omënëk fo eyeyan ed Kaxanu el ang këbi ŷandind omër bëndoyer ak, en pirixën gër apexa,

<sup>3</sup> gayikako anang dëŋ nang kën ang nënga ko Axwën ak.

<sup>4</sup> Tëkayino ar ex ekaŷ ebëngw ed lap bani bela an. Xarak, mëŋ ex ed yata ko Kaxanu el, ed xëbënan këŋo el.

<sup>5</sup> Ang këni barënd oxaŷ ex gi aciŷ ak, wën bëte barërin ang oxaŷ obëngw fo, en gixën Aciŷ amënëk, bëşadaxan bëŷwënëk, eno dinaxënënd Kaxanu, paş gë Yesu Kërisët, ocađaxa od onden, od ko ŷana exo ŋanënd.

<sup>6</sup> Gayikwa are rek gër Oñëgw Omënëk:  
«Watin ga këme xwëtënd gër Siyoŋ ekaŷ ekëla, elo sana këme, elo xëbënan ke.  
Do ar kē ŵa endexëm an,  
din aŋo cëfënan na✧.»

<sup>7</sup> Awa ekaŷ elo këŋun yëlënd epëb el, wën bër xwëta këŋo bën. Barikan gër bër aŋo kwëta ex na:

«Ekaỹ elo ex ed lap bani bēbay el xarak mēŋ ex ekēla el✧.»

<sup>8</sup> Do bēte:

«Ekaỹ elo kēni fokērēnd bela bēn, ekaỹ elo kēbi rebēnd✧.»

Ga xey kēbi eni tēf eyeyan ed Kaxanu el, bēte gayik mondako bax ebi gi.

<sup>9</sup> Barikan wēn cēŋ, er hi kēn andēwēra and sana ko Kaxanu, bēr gē ośadaxan or emun, enēng emēnek, bulunda ir xwēn ko. Mondako hik en tēfētēraxēnēnd becērēcaxik bēnd ri ko ar nēcētēgu kēŋun gēr ecamēdan do wēla kēŋun gēr angoben akēbēnaxik andexēm an.

<sup>10</sup> Wēn anēka hi kēn gērēgako bulunda ir Kaxanu, xarak akarēk aŋ, an gi bana bulunda. Kaxanu abaŋo xaỹēnan na endewēn eŋ. Barikan gērēgako axaỹēnan kēŋo xaỹēnanēnd.

<sup>11</sup> Wēn bēmaỹe bēnd ke balēnd mbaŋ bēŋo, axara xara kēmūn gayikako bēr okucan, do bēliyer fo hi kēn, kemēnayin en kwēyēta oñandi od eman od kē wērelind enjēw ok.

<sup>12</sup> Mēlayayindēn ūenene ola orewēn ol mērēxand ir bēr aŋo kwēta ex na Kērisēt bēn. Do gēr ed kēnūn nangašandērand, watindēlexēni bandixa banjekax bandewēn baŋ, eno cēkwaxēn Kaxanu yatir kēbi ĥatēn.

### *End epēb ed owun eŋ*

<sup>13</sup> Ang ūapēk gēr Axwēn ak, pēbindēn olēngw or ex yo. Pēbindēno emun eŋ, mēŋ ar ex ar gapak an.

---

✧ 2:7 2.7 Calemoñēw 118.22 ✧ 2:8 2.8 Esayi 8.14

14 Pëbindënëbi ogofërëner ok gayik emun eŋ fana këbi enëbi nêpend bëwendëran bën do enëbi cëkwand bër kë rind benjekax bën.

15 Enimin oñandi od Kaxanu ok ex, paŋ gë benjekax bend kën rind beŋ, eni cëmind bela bësitarak bën, bër ŷoweŷ ax nang ex na bën.

16 Diyayindën ang bërëyaya fo, bari këren dabayand na gë orëyaya olo en dixën eñëŋenax eŋ ado bayik ŷoweŷ aŋun cëba ex na: giyin okadëp od Kaxanu.

17 Pëbindënëbi bela dek, ŋanindënëbi bëmaŷe bëŋ, yëdayindëno Kaxanu, do pëbindëno emun eŋ.

### *End oxëreceŋ eŋ*

18 Wën bëriyenin bër gër bëciw bën, yëdayindënëbi bëxwën bërewën bën do mayindën endebën eŋ ado eni nemëri, bari ax gi ex na bër bëngwëk do nënga këni bën fo.

19 Gayikwa oyekax kën ŷot ga buŋa kën buŋand en toro në end Kaxanu, gë amena këm.

20 Enimin, ašëkw nde këno šëkwënd ar kë buŋand gër toro në end ga wëndëra ko an? Barikan angëmëne abuŋa kën buŋand në end ga kën rind benjekax, enjekax ex gër ogës od Kaxanu.

21 Në eŋo yataxën këŋun Kaxanu gayik Kërisët, mëŋ bëte, mondako soro ko në endewën na, eno tēfētelixënënd, en tēfaxënënd banjēta bandexēm baŋ.

22 Bari mëŋ elod axo mendëra ex na, bëte elod ala ax wël ex na enëgwëš gër etēŷ edexēm.

23 And bano širërand aŋ ababi wša na,

and baxo sorond aŋ, ala abaŋo wesa na.  
 Barikan aseben seben keŋo amaŋa aŋ ar ke  
 xitind ŝenene an.

24 Meŋ deŋ lebinak bamena bandebi baŋ ger  
 eman endexem and fika keŋo ger kerewa  
 do ŝes ko ne end beŋeŋenax bendeŋi aŋ.  
 Mondako ŝes keŋe ene capexene ge  
 beŋeŋenax beŋ,  
 ene diyaxenende aniyen and ŝenene.  
 Ge tembay indexem in ken fakaxenend.

25 Enimin, aneka hi ban ang oyel or nambarak  
 fo✧.  
 Barikan geregako aneka baka ken ger ar ex  
 axadac  
 do anekona arewen.

### 3

#### *End ener en*

1 Beŋe wen besoxari ben, mayinden awa end  
 becen bendewen en. Angemene mondako ken  
 rind, axor keneŋi xor becen bendemar ado ga  
 bani hepand end Kaxanu en. Axor keneŋi xor  
 ge eyeyan kem, ge ola orewen ol,

2 angemene eni watend ger aniyen andewen  
 mene awen wen ken do mene wen afeb feb  
 keneŋi.

3 Oŋaŋenaran odewen ok kexer gi na or  
 fac: olap, ge baŋepe band kaŋe, ge beŋwen  
 bend kaŋe, ge orexer or kaŋe do ge banjem  
 bakebenaxik.

4 Barikan gil ex lef ger emekw, oŋaŋenaran  
 od din ax biwend na, od onden onenga, do ond

---

✧ 2:25 2.25 Esayi 53.4-6



angwëlëra. Ata oñañënarän od mondako ok, mbañ këño xëbënanënd Kaxanu.

<sup>5</sup> Oye olo šot bani bësoxari bëwënëk bër angwën bën, bër xwëta baño Kaxanu bën ga banëbi fëbënd bëcën bëndebën bën.

<sup>6</sup> Gako Sara, afëb fëb baño Abëraxam xali baño wãcënd: «Axwën aram✧.» Odënaŵ odexëm hi kën angëmëne ari kën rind benjekax bën, xarak er kën yëdand gebatak añun yëbun ex na.

<sup>7</sup> Bëte wën bëcën bën, mëlayayindënëbi endëmane fo bolindaŵ borewën gër eñër edewën, ga nang kën mëne ola orebën ol ax këme na bon. Pëbindënëbi, gayikwa bën bëte ašot këni šot aniyän and ko yëlënd Kaxanu në end oyekax orexëm añ. Diyindën mondako, ata bayik yoweÿ ax bedi na cale indewën in.

### *End ebalër eñ*

<sup>8</sup> Awa wën wëlëringdën, balëringdëleñun ang bër acël amat fo, cotindën anjëlan amat, bëngwëlex onden ondwën oñ, banayindën.

<sup>9</sup> Ax gi ex na momaşën eñëñëxax eñ gë eñëñëxax, do ocir ok gë ocir. Ecëñëxët, karanindënëbi benjekax bošandax, gayikwa në eño yataxën këñun Kaxanu en cotaxën obetak or fenin këñun ol.

<sup>10</sup> Enimin, Oñëgw Omënëk ok ga rek: «Ar yandi këño exo ñan aniyän añ do exo cot bakey banjekax an, etëÿ edexëm el tebëlex odëna ok, do gë etitinaxën ed bela el.

<sup>11</sup> Kwëÿëtalexo bëñëñëxax bën

---

✧ 3:6 3.6 Añanar 18.12

do diyindëlexo benjekax.  
Calayindëlexo aketëxeta aŋ,  
do kemënayindëxelo exo ŋatën.

<sup>12</sup> Gayikwa bangës band Axwën baŋ anëkona  
këbi nëkonand bër ŝenene bën,  
do gë banëf bandexëm baŋ,  
abaxët ko baxëtënd cale indebën iŋ.  
Barikan ašus këbi ŝusënd bër kë rind  
beñëŋanax bën✧.»

<sup>13</sup> Do wën nobën cëŋ këŋun rinan eñëŋanax  
angëmëne benjekax kën balëkënalind?

<sup>14</sup> Ado enun toronënd në end or ŝenene eŋ,  
nëngandërayindëleŋun! Kërenëbi yëdand na  
do këreŋun bëlandërand na.

<sup>15</sup> Barikan, pëbindëno Kërisët, mëŋ aŵënëk  
an, ang Axwën fo, gër oŵëkw orewën. Giyindën  
laŋ bëŵelëk bër eno yakand kerët ar këŋun  
ŵëka yo eno pelëra ine kën yaraxënënd er kën  
yarënd in.

<sup>16</sup> Barikan, yakayindën endëmane fo, do gë  
onden onjekax. Ata bër këŋun ŝirërand në  
end ola or ŝenene or yël këŋun Kërisët bën  
cëfënanindëlebi gër ed ebax enun yëlan yëy.

<sup>17</sup> Enimin, pecanëleŋun en torond ga kën  
rind enjekax eŋ angëmëne mondako yandi këŋo  
Kaxanu, bari ax gi ex na ga wëndëra kën.

<sup>18</sup> Gayikwa Kërisët amat fo soro ko do ŝës ko  
në end beñëŋanax, mëŋ ar ŝenene, në end bela  
bësëmbak, eŋun mëlaxën gër Kaxanu. Eman  
endexëm eŋ laŵ bani, barikan Angoc Amënek  
aŋ xaninëgu këŋo abëngw.

✧ **3:12 3.12** Calemoñëw 34.13-17

19 Gë angoc andexëm aŋ ye baxo Kërisët ebi tēfētandërax endexëm eŋ ßangoc ßand gër epëra ßaŋ.

20 Akarëk aŋ, ßangoc ßaŋo ßaŋo wëŝenënd Kaxanu. Mëŋ abuŋan ßuŋan baßi xali fika ko Nowe Akuluŋ and fexaxën bani mëŋ gë bela bëcongëbëxi polo gër men aŋ.

21 Eŋo ex amatinali and xobuyi or këŋun fexënënd gërëgako el, ßari ax dëxëtënd na abuyar ir eman in. Xobuyi olo onden onjekax ex gër lëngw ir Kaxanu paß gë ekani ed Yesu Kërisët gër ecës el.

22 Mëŋ ex ar ßakak yaŋ gër orën do yëpax ko gand liw ir Kaxanu an, mëŋ ex ar këno ßaxëtënënd omeleka an, ßangoc ßand wunëk ßaŋ do gë ßand gë panga ßaŋ.

## 4

### *End aniyān angaŝax eŋ*

1 Awa gayikako Kërisët asoro soro ko gër eman endexëm, wën bëte giyin bëwëlëk ang bër emer fo en torond mondako fo. Gayikwa ar sorok gër eman endexëm an, anëka ŝapër këni gë eñëŋënaŋ eŋ,

2 exo di yaxënënd bakey ßand ßayi këŋo gër ebar ßaŋ ang këŋo yandind Kaxanu ak, ax gi ex na ang ex oñandi oñëŋënaŋ ak.

3 Enimin akarëk aŋ, gwac xwënda ban edi ed bebër ñan këni bër aŋo kwëta ex na Kërisët bën: asëk alakirand fo in, oñandi oñëŋënaŋ ok, ekureliran el. Ata wën monjëlāya ban yëlāyand

gër ñambëran in, gër oşeb ol, do gër ekëla ed olaş el, xarak aşëba şëfbak.

<sup>4</sup> Gërëgako aşaran këbi şaranënd ga kënun watënd mëne an bo ex na ga kën xaşërend gë bën gër eñac, mëñ kënun renaraxënënd.

<sup>5</sup> Barikan bën ayaka këno yakad ar ÿapëk ebi kiti bela bëbëngw do gë bëşësëk an.

<sup>6</sup> Enimin, mëñ nangënxën kënebi Atëfëtan añ bëşësëk bën dëñ eni dïyaxënënd gë Angoc and Kaxanu añ ang ak ado ga xiti kënebi ang dek bela ak.

### *End oyekax eñ*

<sup>7</sup> Ekwët ed beÿ dek el anëka saxëguk. Awa giyin bërenik do bër gë anjus, en kemënxënënd gër cale.

<sup>8</sup> Damana beño dek, balëringëleñun mbañ andewën rewën añ, gayikwa añana añ alaş kë labënd beñëñënx bëdanjëm.

<sup>9</sup> Mëlayarindën aye ang këno wëlayand aliyer gër bëciw bëndewën ak, xarak an ñunëñunand na.

<sup>10</sup> Ala kala diyenindëlebi boşandañ gë anjëla and yël këno Kaxanu, në end oyekax orexëm añ. Angëmëne mondako kën rind ata kën hi bër xwëtan kënebi banjëla band ko yëlënd Kaxanu në end oyekax orexëm.

<sup>11</sup> Ar yël këno eyeyan an, deyarayindëlexo bend re ko Kaxanu beñ. Ar yël këno edëcara ed bela an, dëcarayindëlebi gë ojañ od yël këno Kaxanu ok. Gër end ex yo, cëkwëndino Kaxanu paş gë Yesu Kërisët, mëñ ar gë enjaran do gë panga ind din ir din an. Amen!

### *End toro eŋ*

<sup>12</sup> Wën bëmaŷe bënd ke balënd mbaŋ bëŋo, ga kën sorond ako, atëŷ añëkaxik ex, këreŋun caranënd na nangëde ax ñap ex na fo.

<sup>13</sup> Ecëñëxët, nëngandërayindëleŋun ga kën sorond, ang soro ko Kërisët ak. Mondako ŷapëk ex gi eŋun nëngandëraxënëd nëmëc yatir ko nëcëtëgu dek enjaran endexëm eŋ.

<sup>14</sup> Ado enun cirërand në end oŵac or Kërisët nëngandërayindëleŋun, gayikwa Angoc and gë enjaran aŋ, and Kaxanu aŋ, gër ola orewën hi ko!

<sup>15</sup> Barikan wën, gabatak kërexo torond na në end ga laŵ këŋo ala, në end ga rekara ko, në end ga wëndëra ko ba në end ga lil këbi bela gër bendebën.

<sup>16</sup> Angëmëne ga hi ko këreceŋ ko soroxënënd, cëkwayindëleŋo Kaxanu në end oŵac olo, këreŋo cëfënanënd na.

<sup>17</sup> Gayikwa anëka ñatëguk kiti ind kë ŷana gër ekun ed Kaxanu iŋ. Xarak angëmëne gër ndeŋi kë ŷanand kiti iŋ, mondake kë ñata gër bër ñëpëk eni kwëta Atëfëtan and Kaxanu bën?

<sup>18</sup> Ang rek Oñëgw Omënëk ak: «Angëmëne alak lakëk exo pexaxën ar ŷenene an, mondake cëŋ kë hi end asëmbak eŋ, do gë end aŵëndëran eŋ\*?»

<sup>19</sup> Awa bër kë sorond gër edi ed benjekax gayik Kaxanu ŷandi këŋo ebi gi mondako bën, tebayalexëni gër otaxan odexëm, mëŋ ar ex mokwëta an.

---

☆ **4:18 4.18** Andorenik 11.31

## 5

*End emëlayan ed okëreceŋ eŋ*

<sup>1</sup> Awa bëlëngw bër ex mërëxand irewën bën ŷandi ke mëni pelëra gërëgako. Wëno dëŋ alëngw hi këme ang bën ak, sede ir toro ind Kërisët hi keme, do bête ahixeli këme hixeli gër enjaran endexëm and ko ŝanayawëgu aŋ.

<sup>2</sup> Kadacindënëbi ŝenene bër gër amara and xwëtënan këŋun Kaxanu bën. Nëkonayindënëbi gë emëkw el dek ang ñan ko Kaxanu ak, xarak ax gi ex na në end acosa fo, bête ax gi ex na ga kënun nëŷalind.

<sup>3</sup> Ola orewën ol gilex or këni xor eni tēfētelind bër gër amara bën. Kërenëbi bëñand na nangëde wën xwën këbi fo.

<sup>4</sup> Do and ko ŝanayaw alëngw ar bëxadac aŋ, aŝos këŋun ŝos gë ekamote ed owun ed gë enjaran ed din ir din el.

<sup>5</sup> Bête ocambenjar ok gë odënaŵ ok, baxëtindënëbi bëlëngw bën. Banayindën gër banëkëra bandewën, gayikwa are rek gër Oñëgw Omënëk:

«Kaxanu ayël këbi yëlënd oyekax orexëm ol bër  
kë banand bën,  
barikan aŵereli këbi wërelind bër kë rafënan  
bën<sup>☆</sup>.»

<sup>6</sup> Awa wën banayindën gër lëngw ir Kaxanu, mëŋ ar gë panga an, eŋun dafëanaxën and këŋo ñatan aŋ.

---

☆ 5:5 5.5 Andorenik 3.34

<sup>7</sup> Kwëtinayindën gër ndexëm dek beber këjun sibanënd gër banjêlan bandewën bën, gayikwa mën afëyëpëy këjun feyëpëyënd.

<sup>8</sup> Giyin gë anjus, këren nambinand na. Şabucara in, arangoyëra ar gë wën an cën, abëtëra këjun bëtarand ga ko şaland noyo këno yamb ang yëraŋ ir këno sisand emacar end këno yamb fo.

<sup>9</sup> Nöpindën endexëm eŋ do kemënayin gër ekwëta ga nang kën ako mène oyot od obat këjun wëcanënd gë bëmaÿe bëndewën bënd gër ngwën ro bën.

<sup>10</sup> And kën soro imëd aŋ, Kaxanu mën ar gë oyekax an, mën ar waceli këjun enjaran end din ir din end ex gër Yesu Kërisët eŋ, axanin këjun xanin, abaşën këjun abaşën ojaŵ ok do axemën këjun xemën en gixën bër rëcf këbi aye.

<sup>11</sup> Mën ga xwënëk wa owun ol din ir din! Amen!

### *Epelar el*

<sup>12</sup> Silas, imaÿe ind xwëta këmo gër Axwën in, rëca ke mun ñëgwënëli bepënëfëne beŋo. Aÿandi ÿandi ke me deya oyekax or däl or Kaxanu ol, mun kemënaşën, awa kemënayin mbaŋ!

<sup>13</sup> Bërëwäk bër hik gër Babilon bën, bër yata këbi Kaxanu ang wën ak bën, këjun şëmand. Aşëma këjun şëmand bëte asëniwën Marëk.

<sup>14</sup> Cëmarëxën momëgar ang bëmaÿe bënd këbi balërënd fo. Awa wën dek bër xwën këjun Kërisët bën, cotin obetak ol.

**Oniyan**  
**Oniyan: Oniyan (New Testament+)**

copyright © 2017 Wycliffe Bible Translators, Inc.

Language: Oniyan

Contributor: Wycliffe Bible Translators, Inc.

All rights reserved.

2025-04-29

---

PDF generated using Haiola and XeLaTeX on 29 Apr 2025 from source  
files dated 29 Apr 2025  
8b7902f3-5e35-5b89-86b2-c6da1be458b9